

## SAMÞYKKT

### um fráveitur í Ásahreppi.

#### I. KAFLI

##### Almennt.

##### 1. gr.

Samþykkt þessi gildir um fráveitur í Ásahreppi eins og hún er skilgreind í 3. tölul. 3. gr. laga nr. 9/2009, um uppbyggingu og rekstur fráveitna, og nær til allra fasteigna, íbúðarhúsnæðis, frístundahúsa, stofnana og atvinnustarfsemi í sveitarfélaginu. Samþykktin nær til allra fráveitna, þar með talið allra mannvirkja sem reist eru til meðhöndlunar eða flutnings á frárennsli, svo sem rotþróa með siturlögn, set- og sandskilja, fellitanka og olú- og fitugildra.

Kröfur um söfnun, hreinsun og losun frárennslis byggja á lögum nr. 7/1998 um hollustuhætti og mengunarvarnir, lögum nr. 9/2009 um uppbyggingu og rekstur fráveitna og reglugerðum um fráveitur og skólp, um meðhöndlun seyru, um varnir gegn mengun vatns og um varnir gegn mengun grunnvatns.

Samkvæmt lögum nr. 7/1998 um hollustuhætti og mengunarvarnir hefur heilbrigðisnefnd Suðurlands eftirlit með framkvæmd samþykktar þessarar. Hreppsnefnd heldur skrá yfir hreinsivirki, svo sem rotþrær og siturlagnir þeirra og settanka og færir staðsetningu þeirra í skipulagsáætlanir sveitarfélagsins.

Þeir aðilar sem sjá um meðhöndlun seyru, þ.m.t. flutning, notkun og hreinsun, skulu hafa til þess tilskilin starfsleyfi í samræmi við reglugerð um losun frá atvinnurekstri og mengunarvarnareftirlit. Jafnframt skal hreinsivirki fráveitu sem meðhöndlar meira en 50 pe. hafa starfsleyfi samkvæmt ákvæðum sömu reglugerðar.

##### 2. gr.

Markmið samþykktar þessarar er að:

- a. skýra skyldur sveitarfélagsins og notenda hvað varðar fráveitumál og fráveituframkvæmdir,
- b. tryggja uppbyggingu og starfrækslu fráveitna þannig að frárennsli valdi sem minnstum óæskilegum áhrifum á umhverfið,
- c. skýra réttindi og skyldur eigenda og notenda fráveitna og
- d. stuðla að hagkvæmni í uppbyggingu og starfrækslu fráveitna.

#### II. KAFLI

##### Fráveitur.

##### 3. gr.

Ásahreppur ber ábyrgð á uppbyggingu fráveitna í sveitarfélaginu í samræmi við 1. mgr. 4. gr. laga nr. 9/2009 um uppbyggingu og rekstur fráveitna. Sveitarstjóri fer með umsjón, hönnun, framkvæmdir og rekstur fráveitna sveitarfélagsins í umboði hreppsnefndar.

Sveitarfélagið getur tekið að sér fráveitu á öðrum svæðum í sveitarfélaginu í samræmi við 6. mgr. 4. gr. laga nr. 9/2009 um uppbyggingu og rekstur fráveitna. Sveitarsjóður kostar rekstur fráveitna sveitarfélagsins og framkvæmdir við þær.

Hreppsnefnd ákveður framkvæmdir við fráveitur og veitir árlega fé á fjárhagsáætlun sveitasjóðs til reksturs og framkvæmda við þær. Hreppsnefnd eða félagi í eigu sveitarfélaga er heimilt að gera þjónustusamninga við einkaaðila um rekstur fráveitu sveitarfélagsins, að hluta til eða öllu leyti.

Hreppsnefnd er heimilt að fela stofnun eða félagi sem er að meirihluta í eigu sveitarfélaga skyldur sínar og réttindi hvað varðar uppbyggingu, rekstur og eignarhald fráveitna samkvæmt 6. gr. laga nr. 9/2009 um uppbyggingu og rekstur fráveitna.

##### 4. gr.

Fráveitur veita frárennsli sem getur verið húsaskólp, iðnaðarskólp, ofanvatn, frárennslisvatn hitaveitu, kælivatn og ræsisvatn um fráveitulagnir frá byggð til hreinsivirkis.

Einföld fráveita veitir skólpi og ofanvatni saman í einni fráveitulögn en tvöföld fráveita veitir skólpi og ofanvatni í tveimur aðskildum fráveitulögnum.

### III. KAFLI

#### **Uppsetning og framkvæmd fráveitna og rotþróa eða annarra hreinsivirkja.**

##### 5. gr.

Húseigendur leiða frárennsli húsa um hreinsivirki. Kerfisbundin söfnun og sameiginlegt hreinsivirki skal þó vera á svæðum sem falla undir 3. og 4. mgr. 4. gr. laga nr. 9/2009 um uppbyggingu og rekstur fráveitna. Enn fremur skal hreppsnefnd setja ákvæði um safnkerfi og sameiginlegt hreinsivirki inn í deiliskipulag þar sem það á við. Húseigandi kostar niðurstæðing og annan frágang staks hreinsivirkis, svo sem rotþróa með siturlögn, og lagna svo og viðhald þeirra en sveitastjórn getur sett sérstakar reglur um stuðning við framkvæmdirnar. Rotþró með siturlögn og önnur hreinsivirki skulu samþykkt af byggingarfulltrúa. Gerð og hönnunarforsendur rotþróar er háð samþykki heilbrigðisnefndar og skulu vera í samræmi við leiðbeiningar Umhverfisstofnunar.

Hverja rotþró og önnur hreinsivirki skal hreinsa og tæma eftir þörfum samkvæmt nánari ákvæðum samþykktar þessarar. Hreinsun fer fram á vegum Ásahrepps og skal heilbrigðisnefnd hafa eftirlit með framkvæmd hennar.

Um meðhöndlun seyru fer samkvæmt reglugerð um meðhöndlun seyru.

Hreppsnefnd er heimilt að fela öðrum aðilum meðhöndlun seyru og framkvæmd hreinsunar. Meðhöndlun seyru er háð starfsleyfi heilbrigðisnefndar í samræmi við ákvæði reglugerðar um losun frá atvinnurekstri og mengunarvarnareftirlit. Farga skal seyru á viðurkenndri móttökustöð í samræmi við ákvæði laga nr. 55/2003 um meðhöndlun úrgangs. Ef nýta á seyru þarf samþykki heilbrigðisnefndar Suðurlands hverju sinni.

##### 6. gr.

Þegar veita skal frárennsli frá húseignum um hreinsivirki, svo sem rotþró með siturlögn, skal sækja um það til byggingarfulltrúa sveitarfélagsins á þar til gerðum eyðublöðum. Umsóknir skulu undirritaðar af húseigendum eða fullgildum umboðsmönnum þeirra. Sé þörf á er hreppsnefnd heimilt að óska eftir teikningum af fráveitulögnum húsa og lóða og fráveitum frá húseignum sem tengja á fráveitu sveitarfélagsins, ásamt teikningum sem sýna gerð hreinsivirkis, stærð og staðsetningu þess og hreinsun í viðtaka auk teikninga af fráveitulögnum húsa og lóða. Hreinsivirki skal valinn þannig staður að auðvelt sé að komast að því með tæki til hreinsunar.

##### 7. gr.

Teikningar skulu fylgja almennum reglum um hönnun fráveitulagna í húsum, sbr. byggingarreglugerð, íslenska staðla og byggingarskilmála. Allt efni skal standast kröfur um efni og vinnu sem gerðar eru á hverjum tíma.

##### 8. gr.

Byggingareftirlit sveitarfélagsins skal hafa eftirlit með því að fráveitulagnir frá húseignum séu lagðar samkvæmt samþykktum teikningum. Áður en lagnir eru huldar skal einnig taka út og viðurkenna fráveitu frá húseignum og tengingar þeirra við stök hreinsivirki, svo sem rotþrær og siturlagnir.

##### 9. gr.

Húseigendum er skylt að halda vel við fráveitulögnum húseigna sinna og stakra hreinsivirkja á sinn kostnað og gæta þess að þær stíflist ekki.

Eigendum húseigna sem skylt er að hafa fitu- eða olúgildru á fráveitu bera ábyrgð á að slíkum búnaði sé komið fyrir og viðhaldið. Olúgildru skal a.m.k. setja við bifreiðaverkstæði og aðra sambærilega mengandi starfsemi. Fitugildirur skulu vera á fráveitum stórelldhúsa. Um mengunarvarnir

fer að öðru leyti samkvæmt ákvæðum laga nr. 7/1998 um hollustuhætti og mengunarvarnir og reglugerða settra samkvæmt þeim, svo og starfsleyfum.

#### IV. KAFLI

##### **Gjaldtaka.**

###### 10. gr.

Hreppsnefnd er heimilt að nýta sér heimild í 7. mgr. 15. gr. laga nr. 9/2009 um uppbyggingu og rekstur fráveitna til að lækka eða fella niður gjöld samkvæmt þeim lögum hjá tekjulágum elli- og örorkulífeyrisþegum samkvæmt reglum sem hreppsnefnd setur.

###### 11. gr.

Fyrir hreinsun og tæmingu á rotþró, annarra stakra hreinsivirkja og förgun seyru skal húseigandi greiða seyruhreinsunargjald sem standa skal undir kostnaði við verkið. Gjald þetta skal ákveðið með sérstakri gjaldskrá í samræmi við 15. gr. laga nr. 9/2009 um uppbyggingu og rekstur fráveitna, sbr. og ákvæði 23. gr. laga nr. 55/2003 um meðhöndlun úrgangs. Hreppsnefnd setur og lætur birta gjaldskrána í B-deild Stjórnartíðinda í samræmi við ákvæði 59. gr. laga nr. 7/1998 um hollustuhætti og mengunarvarnir. Seyruhreinsunargjald skal innheimt á sama hátt og fasteignagjöld til sveitarsjóds Ásahrepps. Heimilt er að innheimta aukagjald af þeim húseignum þar sem um óvenju mikinn kostnað er að ræða við hreinsun og tæmingu, svo sem vegna barkalengdar, endurkomu o.s.frv., eða þegar um sérstaka rotþró við útihús er að ræða. Gjald þetta má þó aldrei vera hærra en svo að nemi sannanlegum kostnaði við verkið.

#### V. KAFLI

##### **Hreinsun seyru og setefna.**

###### 12. gr.

Hvert stakt hreinsivirki skal hreinsa og tæma eftir þörfum. Hreinsun seyru og setefna skal að öllu jöfnu framkvæmd annað hvert ár við skóla, heilbrigðisstofnanir, matvælaframleiðslustaði, veitinga- og gistipjónustu og þriðja hvert ár við heimili og frístundahús. Fulltrúi sveitarfélagsins hefur yfirstjórn með verkinu og skal hann jafnframt vera tengiliður og sjá um samskipti við þá aðila sem annast verkefnið á hverjum tíma, í samráði við heilbrigðisnefnd Suðurlands.

###### 13. gr.

Fulltrúi sveitarfélagsins sendir út tilkynningu árlega um hvenær seyruhreinsun fari fram. Sérhverjum húsráðanda er skylt að sjá til þess að aðgengi fyrir hreinsunaraðila sé gott að hreinsivirkjum, þar með talið rotþróum og settönkum. Heimil er notkun viðurkenndra gerla og ensíma til að auka virkni hreinsivirkja.

#### VI. KAFLI

##### **Málsmeðferð og gildistaka.**

###### 14. gr.

Hafi fasteignareigandi kvörtun fram að færa vegna hreinsunar rotþróa og annarra hreinsivirkja skal hann koma slíkri kvörtun á framfæri við Ásahrepp. Telji viðkomandi sig ekki fá fullnægjandi úrlausn hjá sveitarfélaginu, getur hann leitað til heilbrigðisnefndar Suðurlands.

###### 15. gr.

Um valdsvið og þvingunarúrræði fer samkvæmt XVII. kafla laga nr. 7/1998 um hollustuhætti og mengunarvarnir. Um viðurlög fer samkvæmt XIX. kafla laga nr. 7/1998 um hollustuhætti og mengunarvarnir. Heimilt er að kæra stjórnvaldsákravðanir samkvæmt þessari samþykkt til úrskurðarnefndar umhverfis- og auðlindamála.

16. gr.

Samþykkt þessi staðfestist hér með samkvæmt 59. gr. laga nr. 7/1998 um hollustuhætti og mengunarvarnir, ákvæðum 2. mgr. 8. gr. laga nr. 55/2003 um meðhöndlun úrgangs og samkvæmt 10. mgr. 4. gr. laga nr. 9/2009 um uppbyggingu og rekstur fráveitna og öðlast þegar gildi. Frá sama tíma fellur úr gildi samþykkt nr. 1018/2009 um fráveitu og meðhöndlun seyru í Ásahreppi.

*Umhverfis-, orku- og loftlagsráðuneytinu, 5. júlí 2022.*

F. h. r.

**Sigurbjörg Sæmundsdóttir.**

\_\_\_\_\_  
*Trausti Ágúst Hermannsson.*

\_\_\_\_\_  
B-deild – Útgáfudagur: 19. júlí 2022